

2000-06-26- SS Ioannes Paulus II - Epistola ‘Fratri Nostro Lucae Cardinali Moreira Neves’

LETTERA DEL SANTO PADRE GIOVANNI PAOLO II ALL’EM.MO CARD. LUCAS MOREIRA NEVES
IN OCCASIONE DEL CINQUANTESIMO ANNIVERSARIO DELLA ORDINAZIONE PRESBITERALE
Venerabili Fratri Nostro LUCAE S.R.E. CARDINALI MOREIRA NEVES Congregationis pro Episcopis
Praefecto atque Pontificiae Commissionis pro America Latina Praesidi

Appropinquante feliciter anniversaria memoria ordinationis sacerdotalis tuae, Venerabilis Frater Noster, tecum
coniungimur gratias Domino simul agentes de hoc vitae tuae eventu necnon totius ministerii tui cursu. Sic enim
facere Nobis placet in honorificis omnibus commemorationibus quibus Fratres Nostri in Episcopatu per orbem
secundum datas occasiones coluntur.

Talis etiam tibi, Venerabilis Frater Noster, dabitur mox a Divino Pastore opportunitas vehementer laetandi et
Nobis ideo studiose gratulandi, cum die nono proximi mensis Iulii percoletur sacerdotii tui ipse dies natalis ac
proinde totum recoletur diuturni ministerii tui frugiferum maxime ac praeclarum laudibus curriculum. Eadem
itaque fraternali animi affectione in teque caritatis singularis magnitudine, qua adhuc te tum hic Romae tum in
patria operantem sumus libenter prosecuti et semper, has Nostras gratulantes voces ad te Litteris istis pervehi
volumus, unde participes plane reddamus communis concelebrationis presbyteratus tui primordiorum.

Cum universa religiosa tua familia Ordinis Praedicatorum nimis consentimus, intra quam actuosissimum
tuum pro Christo et Ecclesia apostolatum pluribus in operibus explevisti pro omni fidelium coetu et
communitatis catholicae incepto, pro Brasiliiana Episcoporum Conferentia et Apostolicae Sedis industria. De te
gloriantur Dominicani Fratres de cursuque multiplicis tuae navitatis hos quinquaginta superiores annos, ex quo
tempore proprium Ordinis opus absolvere coepisti at non longe post ad latorem Ecclesiae campum in patria
protendisti.

Te inde ac tuas pastorales mentis dotes cognoverunt veluti ex propinquo communitas Sancti Pauli, ubi
Auxiliarem egisti Episcopum, item vero Consilium Episcopale Latino-Americanum atque Episcoporum
Conferentia Brasiliæ, ubi complura interea procuravisti munia, potissimum in laicatus provincia tum etiam
communicationum socialium atque socialis actionis. Romani dein Pontifices spectatam tuam experti sunt penitus
officiorum diligentiam in huius Sedis ministeriis variis: Consilii de Laicis cui adlaboravisti ut Alter a Praeside,
Congregationis pro Episcopis ubi prius Secretarium te adesse voluimus Nos exindeque nuperius ipsum
Praefectum, postremo Pontificiae Commissionis pro America Latina cuius partes in praesentia Praesidis sustines.
Undecim autem interim annos magnus quidem sacerdos Ecclesiaeque rector eminuisti primatiali in totius
Brasiliæ sede Sancti Salvatoris fustique Episcopalis Conferentiae tua in patria Praeses a Fratribus in Episcopatu
Brasilianis alacriter delectus.

Maxima ad summam haec sunt sacerdotii tui merita ac monumenta, de quibus tantopere studemus tibi,
Venerabilis Frater Noster, hoc fortunato tempore gratulari, libenter quidem praedicantes quo intimo precationis
et sacrificii adfectu in diversis his omnibus operibus sis versatus, qua animi ditione Christo Bono Pastori ac
fidelitate erga Romanum Pontificem.

Nostro denique ex ore ipso salutationem fraternalm hanc suscipes tamquam Nostro omnino in conspectu atque
sensuum Nostrorum significationem ob intimam concelebrationem tecum aurei presbyteratus tui iubilaei. Tecum
coniungemur memorato illo Iulii mensis nono die gratias Deo munera omnium Datori referentes. Cum tot
pariter aliis consociabimur familiaribus et amicis tuis, familiae religiosae Dominicanæ sodalibus et operis
ubique sociis tuis te in honorando congruenter, cui iam nunc Nos a bonorum pastorum Remuneratore ut praemia
egregiorum coeptorum tuorum affatim tibi retribuat in terris pluraque cumulet in Regno supplices petimus.
Illarum esto gratiarum Benedictio Nostra Apostolica certissimum pignus ac Nostrae in te benevolentiae
documentum.

Ex Aedibus Vaticanis, die XXVI mensis Iunii, anno MM, Pontificatus Nostri vicesimo et secundo.

IOANNES PAULUS II